

## 8 Ê ADARÊ ROJA JINÊN CÎHANÊ PÎROZ BE!..

A.BALÎ

8 ê Adarê jin û jiyan li hemî cîhan destên xwe didin hev. Bi ref û ref, mil bi mil dengê xwe li kolan û salonan bi hev re bilind dikin. Gelo ew 8 ê Adarê çawa bû cejna roja jinên cîhanê? 8 ê Adara 1857 an li bajarê New-Yorkê, jinên ku di febrîqên tekstîlê de dixebitîn, wana ji bo bi destxistina mafên xwe yên wekhev bi çalakî û bi têkoşîna xwe ya karkeran ew bi serketin.

Di sala 1910 an de li Danîmarkê konferansa Sosyalîst Enternasyonel ya Jinan de roja destpêkirina têkoşîna jinên Emerîkî 8 ê Adarê wek Roja Jinên Kedkar ya Cîhanê hate îlan kirin. Di sala 1977 an de jî Neteweyên Yekbûyî 8 ê Adarê ji bo hemî jinan, ew roj wek Roja Jinên Cîhanê bi fermî ew hate pejirandin (qebulkirin).

Ew roj bila li hemû jinên kedkar û azadîxwez pîroz be! Ya rast ew e, ku li welatê me, li Kurdistanê hîn îro jî, mafên gelek jimara jinên Kurd bînpê dibe. Jin bê dil, bi qalîn û bi berdêl û bi peran tînin firotin û guhartin! Bi serbestî karkirina jinan bila ew li alîkî be, pir jinên Kurd bi serê xwe tenê nikanin ji mala xwe derkevin!.. Her roj nûçeyên jinên xwe dişewitînin û yên ji aliyê mîrên xwe ve tînin kuştin zêdetir dibin! Di nav civata Kurd de, bê guman jinên azad û serbest û yên demokrat jî hene. Lê jimara wan kême.

Dewleta Harêma Kurdistan pêwîst e, ku pîrsgirêkên jinên Kurd zûtirîn çareser bike! Wekheviya jin û mîran bi zagona bîngêhî bête pejirandin û di paratîkê de jî, ew wek zagonên nûjen û yên hemdemî pêk bê!

Bi ew helbesta xwe ya li jêr, ez Roja Jinên Cîhanê pîroz dikim û hevkarîya xwe ji jinên cîhanê re nîşan didim. 8 ê Adarê li jinên Kurd û yên hemî cîhanê bila pîroz be!..

### JÎN Û JIYAN

„Ji bo 8ê Adarê“

Gelo, ma çî heye li vê dinê,

Hêja û pîroz, wek her jinê?

Ew hem xweşik û bedew e,

Dayîka jîndaran jî, her ew e.

Dayîk ducanî dibin, diafirînin,  
Bi xwe re ew jiyaneke nû tînin.  
Jin li cîhanê, belavdikin jiyaneke,  
Bi xemlan wê tînin meydanê!

Ji tunebûnê, bes jin avadikin,  
Ewna keda xwe jî, tevê dikin.  
Bes jin in, yêna rû erda cîhan  
Ewna pêşerojê jî didin insan!

Çi pîroz û hêja ye, wek jinan?  
Ji canê xwe can didin mirovan!  
Ew bi keda xwe rûmet û rêz in,  
Neslê civatan jî ewna diparêzin.

Di xwezaya xweşik de her jiyaneke  
Destpêdike bi kar û barên wan.  
Her jin in, ew malan jî avadikin,  
Li hundir tijî bûk û zava dikin!..

Eke jin nebin nav cîh û malan de,  
Mal têkdiçin nav xerab halan de!  
Nifta derî, stûna malê her jin in,  
Jin bi xwe re heroj jiyaneke tînin.

Ey dayîka xweza, rindiya dinê,  
Gelo, çi xweştir e, ji şîrê jinê?!..

Hemî jin berxwedidin, serkevin,  
Ji bin nîrê zordestiyê derkevin!..

Bêjevan, tu çi gotinan rêzbike,  
Ji bo jinan, ew gotina hindik e!  
Tu, gencîneya peyvên Kurdî de,  
Bi van gotina dilê jinan geşdike!

**A. BALÎ, Adar/2010**